

四庫全書

集部

欽定四庫全書

集部

江湖小集卷五十六

詳校官中書臣張姚成

助教臣常循覆勘

覆校官主事臣龔敬身

校對官助教臣胡予襄

謄錄監生臣王時登

欽定四庫全書

江湖小集卷五十六

宋 陳起 編

姜夔白石道人詩集

以長歌意無極好為老夫聽為韻奉別沔鄂親

友

滔滔沔鄂留有醜三宿桑持鉢了白日事賤九蛙蜺念
當去石友烟席凌江湘為君試歌商歌短意則長

佳人魯山下

謂楊大昌正之

日弄清漢波促絃調寶瑟哀思感

人多咬哇秦缶擊冷落郢客歌知音良不易如此粲者何

英英白龍孫

鄭仁舉次皋

眉目古人氣拮据營數椽下簾草

生砌文章作逕庭功用見造次無庸垂罄嗟遺安鹿門意

詩人辛國士

辛泌克清

句法似阿駒別墅浪滄曲綠陰禽烏

呼頗參金粟眼漸造文字無兒輩例學語屋壁祝蒲盧
山陰千載人揮灑照八極只今定武刻猶帶龍虎筆單

侯出機杼

單煒炳文

豈是劍舞得餘波入竹石絕歎咄咄逼

異時之采君在湟守蒼顛黃鐘欠牛鐸淋漓弔遺稿有

子殊可人

蔡迨肩吾子武子字武伯

特未見此老客來請論文但道

曲肱好

中郎逝千霜曲高復誰為龐翁趣無絃鄭伯功斲鼻春
風桃花溪寒淥繞蒼翠何當從兩君放浪討幽事

宦達羞故妻貧賤厭丘嫂上書雲雨迴還舍筍蕨老江
皋阻帶涇夫計良不早士無五段皮沒世抱枯槁

伐木響虛牝我願友褐夫九關呀虎豹何時內高祛黃
鵠眇雲樹鸚鵡澹烟蕪倚杖得清賞洗心觀本初

孤鴻度關山風霜摧翅翎影低白雲暮哀噉那忍聽士
生有如此儲粟不滿瓶著書窮愁濱可續離騷經

過湘陰寄千巖

眇眇臨風思美人荻花楓葉帶離聲夜深吹笛移船去
三十六灣秋月明

鴈圖

萬里晴沙夕照西
此心唯有斷雲知
年年數盡秋風字
想見江南搖落時

赤松圖

山東隆準公未語心已解
按劔堂下人成事
汝應退非無帶礪約
政爾有恩害平生
三寸舌松間漱寒瀨

送朝天續集歸誠齋時在金陵

翰墨場中老斲輪
真能一筆掃千軍
年年花月無閒日
處處山川白見君
箭在的中非爾力
風行水上自戎文

先生只可三千首回施江東日暮雲

送王孟玉歸山陰

淮南雪落雲繞戍王郎鳴鞭獵狐兔問君本是山陰人
何不扁舟剡溪去人生樂事將無同知君此心如太空
只今去踏龍尾道也似寒江策笠翁鑑湖一曲荷花浦
君不歸來花有語舊宅應添竹幾竿到家不覺秋如許
十年雪裏看淮南聚米能作淮南山籌邊妙處須急吐
政自不容修竹閣人道長江無六月日光正射青蘆葉

何以贈君濯炎熱雪即是詩詩是雪

除夜自石湖歸苕溪

此詩錄寄誠齋得報云所寄十詩有栽雲縫霧之妙

思敲金夏玉之奇聲

細草穿沙雪半銷吳宮烟冷水迢迢梅花竹裏無人見
一夜吹香過石橋

美人臺上昔歡娛今日空臺望五湖殘雪未融青草死
苦無麋鹿過姑蘇

黃帽傳呼睡不成投篙細細激流水分明舊泊江南岸

舟尾春風颭客燈

千門列炬散林鴉
兒女相思未到家
應是不眠非守歲
小牕春意入燈花

三生定是陸天隨
只向吳松作客歸
已拚新年舟上過
倩人和雪洗征衣

沙尾風回一棹寒
椒花今夕不登盤
百年草草都如此
自琢春詞剪燭看

笠澤茫茫雁影微
玉峯重疊護雲衣
長橋寂寞春寒夜

只有詩人一舸歸

桑間篝火却宜蠶風土相傳我未諳但得明年少行役
只裁白紵作春衫

少小知名翰墨場十年心事只淒涼舊時曾作梅花賦
研墨於今亦自香

環玦隨波冷未銷古苔留雪卧牆腰誰家玉笛吹春怨
看見鵝黃上柳條

悼石湖三首

身退詩仍健官高病已侵江山平日眼花烏暮年心九
轉終無助三高竟欲尋尚留巾墊角絕域有知音

未作龍蛇夢驚聞露電身百年無此老千首屬何人安
得公長健那知事轉新酸風憂國淚高塚卧麒麟

未定情鍾痛何堪更悼亡遺書知伏枕來弔只空堂雪
裏評詩句梅邊按樂章沈思酒杯落天濶意茫茫

臨安旅邸答蘇虞叟

垂楊風雨小樓寒宋玉秋詞不忍看萬里青山無處隱

可憐投老客長安

張平甫哀挽

將軍家世出臞儒
合上青雲作計疎
吳下宅成花未種
湖邊地吉草新鋤
空嗟過隙催人世
賴有提孩讀父書
他日石羊芳草路
弟兄來此一沾裾

題華亭錢參園池

花裏藏仙宅
簾邊駐客舟
浦涵滄海潤
雲接洞庭秋
草木山山秀
闌干處處幽
機雲韜世業
暇日此夷猶

寄上張參政

姑蘇臺下梅花樹應為調羹故早開
燕寢休誇香霧重
鴛行却望袞衣來前時甲第仍垂柳
今度沙隄已種槐
應念無枝夜飛鵲月寒風勁羽毛摧

雪中訪石湖

雪斫如玉城偏師敢輕犯
黃蘆陣野鷺我自將十萬三
戰渠未降北面石湖范
先生霸越手定目一笑粲

京口留別張思順

伯勞飛燕若為忙
還憶東齋夜共牀
別後無書非棄我
春前會面却他鄉
連宵為說經憂患
異日相逢各老蒼
更欲少留天不許
曉風吹艇入垂楊

虞美人草

夜闌浩歌起玉帳
生悲風江東可千里
棄妾蓬蒿中
化石那解語
作草猶可舞
陌上望騅來
翻愁不相顧

姑蘇懷古

夜暗歸雲繞柁牙
江涵星影鷺眠沙
行人悵望蘇臺柳

曾與吳王掃落花

次韻德久

籬落青青花倒垂
避人黃鳥雨中飛
西郊寂寞無車馬
時有溪童賣菜歸

花藏寺雲海亭望具區

寺為張循王功德院

茫茫復茫茫
中有山蒼蒼
大哉夫差國
坐占天一方
夫差醉蓮宮
大浪搖不醒
越師何從來
奪我玉萬頃
年年亭上秋
一笛千古愁
誰能知許事
飛下雙白鷗

次朴翁遊蘭亭韻

亞字橋亭面面風
六人同坐樹陰中
松交歸路如留客
石礙流杯故惱公
山色最憐秦望綠
野花只作晉時紅
夕陽啼鳥人將散
俯仰興懷自昔同

右軍祠堂有杜鵑花兩株花極照灼

同朴翁登卧龍山

龍尾回平野
簷牙出翠微
望山憐綠遠
坐樹覺春歸
草合平吳路
鷗忘霸越機
午涼松影亂
白羽對禪衣

次韻胡仲芳因楊伯子見寄

此去廬陵定幾程
向來筇杖未經行
懸知征棹雲邊集
大有吟情雪裏生
楚渡食萍應甚美
舜祠吹玉直能清

二君即日青冥上
惟我春山帶雨耕

仲方得萍鄉宰
伯子得營道倅

次石湖書扇韻

橋西一水曲通村
岸閣浮萍綠有痕
家住石湖人不到
藕花多處別開門

夏日寄朴翁朴時在靈隱

風吹松樹枝
懷我松間友
雲從北山來
令我屢回首
山

雲夜夜起山雨侵人衣遙知竹窻裏自吟新雨詩

竹友為徐南卿作

髮已星星帶已寬徐郎猶是客長安家山竹好無由看
謾種庭前一兩竿

世路蒼黃總是愁暮年須得小優游如今漸覺知心少
騰種青青伴白頭

賀張肖翁參政

太乙圖書客屢談已知上相出淮南銀臺日月非虛過

金鼎功名得細參從此與人為雨露應憐有客卧雲嵐
明朝起為蒼生賀旋著藤冠紫竹簪

同潘德久作明妃詩

明妃未嫁時滿宮妬娥眉一朝辭玉陛人人淚雙垂
年年心隨鴈日日穹廬中遙見沙上月忽憶建章宮
身同漢使來不同漢使歸雖為胡中婦只著漢家衣

烏夜啼

老烏棲棲飛且號晨來枝上啄楮桃楮桃已空楮葉死

猶啄枯枝覓蟲蟻老烏賦分何其貧未啼已被隣公嗔
吁嗟老烏不自省牆頭屋上紛成群吳中貴遊重鸚鵡
千金遠致能言語花底紅條鄭袖擎盤中碧果秦宮取
天生靈物得人憐過者須來鸚鵡邊老烏事事無足錄
人間猶傳夜啼曲

壽朴翁

與師同月不同年歸墨歸儒各自緣想得山中無壽酒
但攜茶到菊花前

湖上寓居雜詠

荷葉披披一浦涼
青蘆奕奕夜吟商
平生最識江湖味
聽得秋聲憶故鄉

湖上風恬月澹時
卧看雲影入玻璃
輕舟忽向牕前過
搖動青蘆一兩枝

秋雲低結亂山愁
千頃銀波凝不流
隄畔畫船隄上馬
綠楊風裏兩悠悠

處處堂虛望眼寬
荷花荷葉過闌干
遊人去後無歌鼓

白水青山生晚寒

輦路垂楊兩行栽
苑門秋水欲平階
朝朝南望宮雲起
白鳥一雙山下來

微波衝得綠萍開
數點青青黏石階
綠葑自來還自去
來時須載白鷗來

布衣何用揖王公
歸向蘆根濯軟紅
自覺此心無一事
小魚跳出綠萍中

囊封萬字總空言
露滴桐枝欲斲絃
時事悠悠吾亦懶

卧看秋水浸山烟

苑牆曲曲柳冥冥人靜山空見一燈荷葉似雲香不斲
小船搖曳入西陵

處士風流不並時移家相近若依依夜涼一舸孤山下
林黑草深螢火飛

卧榻看山綠漲天角門長泊釣魚船而今漸欲拋塵事
未了菟裘一悵然

釣窻不忍見南山下有三雛骨未寒惆悵古今同此悵

二陵風雨晉師還

柳下軒窗枕水開
畫船忽載故人來
與君同過西陵路
却指烟波獨自回

指點移舟著柳隄
美人相顧復相攜
上橋更覺秋香重
花在西陵小苑西

坐上和約齋

思入冰輪冷
愁因玉宇開
可無如此客
猶恨不能杯
好句長城立
寒鴉結陣來
瑩篴莫停手
拚却斷腸回

出北關

吳兒臨水宅四面見行舟蒲葉侵鵝項楊枝蘸馬頭
年人去國夜夜月窺樓傳語城中客功名半是愁

平甫見招不欲往

老去無心聽管絃病來杯酒不相便人生難得秋前雨
乞我虛堂自在眠

樓閣萬重秋雨裏峰巒四合暮潮邊鳳城今夕涼如水
多少人家試管絃

三高祠

越國霸來頭已白
洛京歸後夢猶驚
沈思只羨天隨子
策笠寒江過一生

過桐廬

橫看山色仰看雲
十幅風帆不藉人
記取合江江畔樹
他年此處好垂綸

登烏石寺觀張魏公劉安成岳武穆留題劉云

侍兒意真奉命題記

諸老凋零極可哀尚留名字壓崔嵬劉郎可是疎文墨
幾點胭脂汗綠苔

過垂虹

自作新詞韻最嬌小紅低唱我吹簫曲終過盡松陵路
回首烟波十四橋

訪費山人

稻叢茁茁欲齊肩楊柳傲傲不蔽蟬忽憶石頭城下路
槿花斜壓釣魚船

牛渚

牛渚磯邊渺渺秋
笛聲吹月下中流
西風不識張京兆
畫得蛾眉如許愁

武康丞宅同朴翁詠牽牛

青花綠葉上疎籬
別有長條竹尾垂
老覺淡妝差有味
滿身秋露立多時

朴公悼牽牛甚奇余亦作

不見青青繞竹生
西風籬落抱枯藤
道人一任空花過

愁殺山陰覓句僧

春日書懷四首

九真何蒼蒼乃在清漢尾
衡茆依草木念遠獨伯姊
春來衆芳滋春去衆芳委
兄弟各天涯啼鳩見料理
漢江出巨魚風雷入驅使
安得挾我輶西征二千里

春雲驛路暗遊子
眇歸程永懷故山下
風雨悲柏庭翁仲
不解語幽鳥時時鳴
人家插垂柳客裏又清明

垂楊大別寺
春草郎官湖
家巷有石友
合并不待呼瘦

藤倚花樹花片藉玉壺老鄭談絕妙辛楊句敷腴平生
子姚子貌古心甚儒時邀野僧語間與琴工俱酒闌興
未了左轉城南隅大江圍楚碧烟水入玄虛流落不自
恨惟嗟故人疎一月三見夢夢中相與娛日日潮風起
悵望武昌魚

武昌十萬家落日紫烟低亭亭頭陀塔高處白鳥棲白
鳥忽飛去春山空四圍南樓有佳人再召且再辭閉門
課文事櫻物深天機斯人不可致白鳥會來歸

過德清

木末誰家縹緲亭
畫堂臨水更虛明
經過此處無相識
塔下秋雲為我生

溪上佳人看客舟
舟中行客思悠悠
烟波漸遠橋東去
猶見闌干一點愁

予居茗溪上與白石洞天為隣
潘德久字予曰白石道人
且以詩見畀其詞曰
人間官爵似檇蒲
采到枯松亦大夫
白石道人新拜號
斷

無繖駁任稱呼子以長句報貺

南山仙人何所食夜夜山中煮白石世人喚作白石仙
一生費齒不費錢仙人食罷腹便便七十二峰生肺肝
真祖只在南山南我欲從之不憚遠無方煮石何由軟
佳名錫我何敢辭但愁自此長苦饑囊中只有轉菴詩
便當掬水三嚙之

轉菴德久
自號云

筵篔引

筵篔且勿彈老夫不可聽河邊風浪起亦作筵篔聲古

人抱恨死今人抱恨生南隣賣妻者秋夜難為情長安
買歌舞半是良家婦主人雖愛憐賤妾那久住緣貧來
賣身不緣觸夫怒日日登高樓悵望宮南樹

陳君玉以小集見歸用余還誠齋朝天續集韻
作七字變報貺

筆陣無功汗左輪而今老去不能軍水邊白鳥閱於我
牕外梅花疑是君欲向江湖行此話可無朋友託斯文
新篇大是相料理因憶西山揚子雲

丁巳七月望湖上書事

白天碎碎如析綿黑天昧昧如陳玄白黑破處青天出
海月飛來光尚濕是夜太史奏月蝕三家各自矜算術
或云七分或食既或云食晝不在夕上令御史登吳山
下視海門監月出年來歷失無人修三家之說誰為優
乍如破鏡光炯炯漸若小兒初食餅時方下令嚴禁銅
破鏡何為來海東天邊有餅不可食聞說饑民滿淮北
是鏡是餅且勿論須臾還我黃金盆金盆當空四山靜

平波倒浸雲天影下連八表共此光上接銀河通一冷
御史歸來太史眠人間不聞鐘鼓傳白石道人呼釣船
一瓢欲酌湖中天荷葉擺頭君睡去西風急送敲窓句

項里項王之里也在山陰西南二十餘里地多

楊梅苔梅皆妙天下王性之賦項里楊梅云

只今枝頭萬顆紅猶似咸陽三月火予近得

苔梅一枝古怪特甚為作七言

舊國婆娑幾樹梅將軍逐鹿未歸來江東父老空相憶

枝上年年長綠苔

寄田郎

楚楚田郎亦大奇少年風味我曾知
春城寒食誰相伴
夜月梨花有所思
剪燭屢呼金鑿落
倚牕閒品玉參差
含情不擬逢人說
鸚鵡能歌自作詞

待千巖

褰裳望洞庭
眼過天一角
初別未甚愁
別久今始覺
作箋非無筆
寒鴈不肯落
蘆花待挈音
怪底北風惡

若人金石心試命洞庭浪傳聞下巴陵瀝酒喜無恙我
行丹楓林屢騁白蘋望烏鵲不可嗔論功當坐上

古樂府

裁衣贈所歡曲領再三安歡出無人試閨中自著看
甚欲逐郎行畏人笑無媒日日東風起西家桃李開
令我歌一曲曲終郎見留萬一不當意翻作平生羞

賦千巖曲水

紅雨灑溪流下瀨仍小駐魚隊獵殘香故故作吞吐老

子把一盃微風忽吹去

李陵臺

李陵歸不得高築望鄉臺
長安一萬里鴻鴈隔年回
望雖不見時時一上來

送王德和提舉淮東

京塵吹帽汗淋衣相見頻年
只道歸省裏移文那得了
家邊持節未為非煮乾碧海
知誰用割盡黃雲尚告饑
可得不為根本計秋風還見
鴈南飛

寄時父

遲君日日數歸程
到得君歸我已行
一路好山思共看
半年有酒不同傾
吾儕政坐清貧累
各自而今白髮生
人物眇然須強飯
天工應不負才名

雪中六解

塞草汀雲護玉鞍
連天花落路漫漫
如今却憶當年健
下馬題詩不道寒

黃鶴磯邊晚渡時
柳花風急片帆飛
一聲長笛魚龍舞

白浪如山不肯歸

萬馬行空轉屋檐
高寒屢索酒杯添
故人家住吳山上
借得西湖自卷簾

曾泛扁舟詣石湖
恍然坐我范寬圖
天寒遠挂一行鴈
三十六峯生玉壺

萬壑千巖一樣寒
城中別有玉龍蟠
舊人乘興扁舟處
今日詩仙戴笠看

沈香火裏笙簫合
煖玉鞍邊雉兔空
辦得煎茶有驕色

先生只合作詩窮

送李萬頃

猛相思裏得君來
政喜歡時却便回
別路苦無青柳折
到家應有小桃開
起居五馬兼堂上
問訊千巖及阿灰

張禕姪張曙
小字阿灰

兒女癡頑夫婦健
漂零何日共尊罍

送陳敬甫

十年所聞溢吾耳
去年誦君書一紙
古人三語得奇士
況此磊落數百字
相逢千巖萬壑裡
有客如君請兄事

才高自古人所忌論高不售反驚世好詩取客如券契
我無三者猶至是如君之貧不可避如君之貧不可避
呼舟徑渡寒潮外

越中士女春遊

泰山越樹兩依依閒倚闌干看落暉楊柳梢頭春又暗
玉簫聲裏夜遊歸

送彭仲訥往合淝三首

壯志只便鞍馬上客夢長到江淮間誰能辛苦運河裏

夜與商人爭往還

我家曾住赤欄橋
隣里相過不寂寥
君若到時秋已半
西風門巷柳蕭蕭

小簾燈火屢題詩
回首青山失後期
未老劉郎定重到
煩君說與故人知

下孤城

人家多住竹籬中
楊柳疎疎尚帶風
記得下孤城下路
白雲依舊雨三峯

平甫放三十二鷗於吳松余不及與盟

橋下松陵綠浪橫來遲不與白鷗盟知君久對青山立
飛盡梨花好句成

蕭山

歸心已逐晚雲輕又見越中長短亭十里水邊山下路
桃花無數麥青青

生雲軒

在山長與雲同齋出山憶雲雲不來千金買得太湖石

數峯相對寒崔嵬朝來忽覺青苔濕
黶黶如炊石間出白雲何處不相逢
却怪年年枉相憶王郎胸中橫一丘
在山出山雲與遊更呼白石老居士
來倚雲根吟七字

戊午春帖子

晴窓日日擬雕蟲惆悵明時不易逢
二十五絃人不識淡黃楊柳舞春風

送項平甫倅池陽

項侯聲名天宇窄與君俱是荆湖客
向來相聞不相值

長安城中乃相識論文要得文中天邯鄲學步終不然如
君筆墨與性合妙處突過蘇李前我如切切秋虫語自
詭平生用心苦神凝或與元氣接屢舉似君君亦許西
湖一曲古牆陰清坐論詩夜向深見謂人間有公等不
知來者不如今乾坤雖大知者少君不見古人拙處今
人巧我徂山林口挂壁如君合救狂瀾倒石渠春水綠
泱泱閣下無人白日長萬里江湖入歸夢子雲不願校
書郎九華山色梅根渡半日風帆即秋浦六條察吏安

用許幸有千巖作詩侶

偶題

阿八宮中酒未醒
天風吹髮夜泠泠
歸時只怕扶桑暖
赤脚橫騎太一鯨

陳日華侍兒讀書

繹句尋章久未休
花房日晏不梳頭
誰教郎主能多事
乞與冥冥千古愁

女郎山

漢陽縣西
二十里

不見郢中能賦客可憐負此女郎山水魂寂寞無歸處
獨宿鴛鴦沙水寒

金神夜獵圖二首

六言

夜半金神羽獵奔走山川百靈雲氣旂旗來下颯然已
入青冥

後宮嬋娟玉女自鞚八尺飛龍兩兩鳴鞭爭導綠雲斜
墜春風

書乞米帖後

銀鈎鐵畫太師字從人乞米亦可憐
五倉空虛胃神哭
竟日悄悄無炊烟仙人留書說服氣
道士辟穀期引年
人生不食浪自苦獨不見子桑鼓琴十日雨

次韻鴛鴦梅六

言

晴日小溪沙暖春夢憐
渠頸交只怕笛聲驚
散費人月
咏風嘲

漠漠江南烟雨子飛似報初春折
過女郎山下料應愁
殺佳人

呈徐通仲兼簡仲錫通仲與誠齋為鄉人近來
赴調而誠齋去國又通仲久與千巖有茗雪
之約而未至余挽通仲欲與同歸千巖故末
章及之

斯文準乾坤作者難屈指我從李郭遊知有徐孺子春
風橘洲前白月太湖尾懷哉來無期玉唾炯在紙去年
識仲氏何啻空谷喜合并忽自天傾倒見底裏維君天
下士竹箭東南美胡不在石渠諸公當料理千巖今林

宗泉石助風軌示疾不下堂有句高八米此老筆硯交
誠齋古元禮毫端灑秋露去國辭愈偉屬聞都門別回
首即桑梓獨憐茗溪上垂榻俟行李烟波肯尋盟歸櫂
為君艤

答沈器之二首

江漢乘流客乾坤不繫舟玉琴虛素月金劍落清秋野
鹿知隨草饑鷹故上鞞風流大隄曲一唱使人愁
涉遠身良苦登高望欲迷試吟青玉案不似白銅鞮露

下秋虫怨風高北馬嘶
槎頭有新味人在太湖西

釣雪亭

闌干風冷雪漫漫惆悵無人把釣竿
時有官船橋畔過白鷗飛去落前灘

馬上值牧兒

馬背何如牛背短衣落日空山只麼身
歸盤谷未須名滿人間

契丹歌

都下聞蕭總管自說其風土如此

契丹家住雲沙中
耆車如水馬若龍
春來草色一萬里
芍藥牡丹相間紅
拍手高歌垂手舞
琵琶串曲翻新譜
一春浪宕不歸家
自有穹廬障風雨
平沙軟草天鵝肥
七萃齊驅曉打圍
皂旗低昂圍漸急
驚作羊角凌空飛
海東健鶻健如許
韝上風生看一舉
萬里追奔未可知
劃見紛紛落毛羽
平章俊味天下無
年年海上彎琅弧
一鵝先得金百兩
天使走送賢王廬
天鵝之飛鐵為翼
射生小兒空看得
腹中驚怪有新薑
元是江南經宿食

綠萼梅

黃雲承韞知何處
招得冰魂付北枝
金谷樓高愁欲墜
斷腸誰把玉龍吹

次韻千巖雜謠

平生中散七不堪
鳳塵時時伴燕談
道士有神傳火棗
故人無字入雲藍
雨涼竹葉宜三酌
日落荷花倚半酣
極欲扁舟南蕩去
冷鷗輕燕畧相諳

寄上鄭郎中

梅根東望九華雲中有風流衣綉人名下一生勞夢想
尊前數語倍情親節旄在道催歸漢花鳥留君且作春
見說祥雲挾時雨故園松菊亦精神

送左真州還長沙

吳兒牽挽醉蓴鱸今日西歸略自如別路冷雲隨驛馬
望鄉喬木記吾廬湘中花月偏憐酒淮左兒童待擁車
凡我舊遊君更歷橘洲相見訝無書

禽言如曰哥哥

君不見茗溪西南石鼓山鳥如鸚鵡啼其間土人相傳
是阿弟千呼萬喚去復還身為獨鴈失儔侶所愧鶻鷁
圖急難繞林哀哀訴明月夜闌月落聲漸咽天地濶遠
兄不聞蒼厓下淚山竹裂豈無鴉舅與鶻姑人各有心
非友于陟岡四顧空欷歔君不見江南望夫誰家女登
山化石不得語

次韻誠齋送僕往見石湖長句

客來讀賦作雌蜺平生未聞衡說詩省中詩人官事了

狎鷗入夢心無機韻高落落懸清月鏗鏘妙語春冰裂
一自長安識子雲三歎郢中無白雪范公蕭爽思出塵
有客如此渠不貧堂堂五字作城守平章勁敵君在口
二公句法妙萬夫西來橐中藏魯璆只今擊節烏棲曲
不愧當年賀鑑湖

與和甫時甫分題畫卷夔得剡溪圖

枯槎啁乾鵲交臂失夫君奈此一尊酒憑高空水雲

東堂聯句

金風涼夜深吹我蕭蕭髮

趙雍和仲

起折丹桂枝驚落花上

月白
石

次韻武伯

楊柳風微約暮寒野禽容與只波間
道人心性如天馬可愛青絲十二閑

觀燈口號

世間形象盡成燈
烘火旋沙巧思生
列肆又多看不遍
遊人一一把燈行

市樓歌鼓太喧譁燈若連珠照萬家太守令嚴君莫舞
遊人空戴玉梅花

遊人總戴孟家蟬爭詫星毬萬眼圓
鬧裏傳呼大官過
後車多少盡嬋娟

花帽籠頭幾歲兒女兒學著內人衣
燈前月下無歸路
不到天明亦不歸

好燈須買不論錢別有琉璃價百千
都下貴人多預賞
買時長在一陽前

珠絡琉璃到地垂
鳳頭銜帶玉交枝
君王不賞無人進
天竺堂深夜雨時

紛紛鐵馬小回旋
幻出曹公大戰年
若使英雄知此事
不教兒女戲燈前

貴客鈎簾看御街
市中珍品一時來
簾前花架無行路
不得金錢不肯回

修內司人偏戲鼓
輦官營裡獨燒燈
春風到處皆君賜
金柳絲絲滿鳳城

正好嬉遊天作魔
翠帟無奈雨沾何
御街暗裡無燈火
處處但聞樓上歌

和轉菴丹桂韻

野人復何知自謂山澤好
來禪奉常議笳識鼓羽葆
誰憐老垂垂却入闌浩浩
營巢猶是寓學圃何不早
淮桂手所植漢甕躬自抱
花開不忍出花落不忍掃
佳客夜深來清尊月中倒
一禪兩居士更約踐幽討

陪張平甫遊禹廟

鏡裏山林綠到天
春風只在禹祠前
一聲何處提壺鳥
猛省紅塵二十年

乍涼寄朴翁

前日松間步履歸
更將荷葉障秋暉
如今城裏拋團扇
應是山中試袂衣
水有秋容蓮漸少
樹含涼氣鳥慵飛
炎天既懶趨城市
從此尤須戀翠微

寄俞子

此郎都無子弟氣
夜對黃嬾籠青燈
只今落脚墮鳶外

欲往從之歎未能
郎罷才名今白髮
佐州亦復坐窮邊
甚欲出手相料理
東南風高難寄牋

昔遊詩

夔早歲孤貧奔走川陸數年以來始獲寧處
秋日無謂追述舊遊可喜可愕者吟為五字
古句時欲展閱自省生平不足以為詩也

洞庭八百里玉盤盛水銀
長虹忽照影大哉五色輪
我舟渡其中晃晃驚我神
朝發黃陵祠莫至赤沙曲
借問

此何處滄灣三十六青蘆望不盡明月耿如燭灣灣無
人家只就蘆邊宿

放舟龍陽縣洞庭包五河

澧沅瀆
湘大江

洶洶不得道茫茫將

奈何篙師請小泊石矸沉泥沙是中太無岸強指葦與
莎滯留三四晨大浪山嵯峨同舟總下淚自謂餒龜鼉
白水日以長僅存青草芽轉盼又已沒但見千頃波此
時羨白鳥飛入青山阿

九山如馬首一一奔洞庭小舟過其下幸哉波浪平大

風忽怒起我舟如葉輕或升千丈坡或落千丈坑回望
九馬山政與大浪爭如飛鵝車礮亂打睢陽城又如白
獅子山下跳鬚鬢須臾入別浦萬死得一生始知茵席
濕盡覆杯中羹

蕭蕭湘陰縣寂寂黃陵祠喬木蔭樓殿畫壁半傾敲蘆
洲雨中淡漁網烟外歸重華不可見但見江鷗飛假令
無恨事過此亦依依

我乘五板船將入沌河口大江風浪起夜黑不見手同

行子周子渠膽大如斗長竿插蘆席船作野馬走不知
何所詣生死付之偶忽聞入草聲燈火亦稍有棹船遂
登岸急買野家酒

天寒白馬渡

漢川縣界

落日山陽村是時無霜雪萬里風奔

奔外旃吹已透內纊冰不溫吹馬馬欲倒吹笠任飛翻
不見行路人但見草木蕃忽看野燒起火燄燒乾坤聲
如震雷震勢若江湖吞虎豹走散亂麋鹿不足言夜投
野店宿無壁亦無門此行值三厄幸得軀命存明發見

老姊斗酒為招魂

揚舲下大江日日風雨雪留滯鰲背洲十日不得發岸
冰一尺厚刀劍觸舟楫岸雪一大深屹如玉城堞全舟
二三士頗壯不恐懼蒙羶閉篷卧波裏任傾擷晨興視
羶上積雪何皎潔欲上不得梯欲留岸頻裂扳援始得
上幸有人見接荒村三兩家寒苦衣食缺買豬祭波神
入市路已絕如今得安坐閒對妻兒說

青草長沙境洞庭渺相連洞庭西北角雲夢更無邊復

有白湖沌渺漭里數千豈惟大盜窟神龍所盤旋白湖
辛巳歲忽墮死蜿蜒一鱗大如箕一髯大如椽白身青
鬚鬣兩角上梢天半體卧沙上半體猶沈淵里正聞之
官官使吏致虔作齋為禳禱觀者足闕闕歛席覆其體
數里聞腥羶一夕雷雨過此物忽已遷遺跡陷成川中
可行大船是年金兵至擊走江之孺或云祖龍讖詭異
非偶然近日山陽人采菱不知還望見三龍浮目若電
火燃見龍多見尾少見四體全一龍已為異三者亦罕

傳又因漁湖側水中忽生烟烟中一驢出繞身步踟躕
俄隨霹靂去欲語無由緣我聞語此事乘舟往觀焉徑
往枯葭浦白鷺爭相先湖有劉備廟實司浩渺權徘徊
無所見歸櫂月明前

昔遊桃源山先次白馬渡

桃源
縣界

渡頭何情深鴻鵠在高

樹白馬亦洞天昔人有奇遇洞門不可見但聞水聲怒
瞻彼羽人宅乃乘方船渡修廊夾五殿重閣映千樹規
模象魏壯回合綠陰護山椒望五溪壺頭入指顧故宮

在其北屋瓦帶松霧古杉晉時物中空野人住外圍四
十尺內可十客聚我遊瞿仙館壇上表遺步却下八疊
坡一亭衆妙具兩山抱澄潭老木枝幹互瞻前秀而迴
坐久凜難駐桃源獨不見僻在宮南路山行轉深邃狙
猿紛上下石竇出微涓令我意猶豫昔聞漁舟子水際
見洞戶今看去溪遠定自後人誤惆悵却歸來此遊不
得屢於今二十年歷歷經行處

昔遊衡山下看水入朱陵半空掃積雪萬萬玉花凝或

如生綃挂或作薄霧橫紛紛虎豹吼往往蛟龍驚人語
不相聞濺電漂我纓有魚緣峭壁上上終不停此中有
神物雷雨周八紘

昔遊衡山上未曉入幽谷欲識所坐輿橫板挂兩竹狀
如秋千垂高下不傾覆登山九千丈中道多佛屋一峯
高一峯峯峯秀林木仰看同來容木末見冠服高臺石
橋路尋常雲所宿下方雷雨時此上自晴旭紫蓋何突
兀萬里在一目餘峯六七十僅如翠浪矗北有嬾瓚巖

大石庇樵牧下窺半厓花杯盃琢紅玉飛雲身畔過攬
之不盈掬祝融最高絕紫蓋不足錄俯視同仰觀蒼蒼
萬形伏惟餘岫嶺峯南睇半空綠髻髻認瀟湘向岳流
屈曲高處驚我魂翻思宅平陸其東有雷穴靈異謹勿
觸雲來綿世界雲去一峯獨僧窻或留罇雲入不可逐
絕頂橫石渠仙人有遺躅山多金光草夜半如列燭靈
藥不可尋吁嗟歸太速

濠梁四無山坡陔亘長野吾披紫茸羶縱飲面微赭自

矜意氣豪敢騎雪中馬行行逆風去初亦略霑洒疾風
吹大片忽若亂飄瓦側身當其衝絲鞵袖中把重圍萬
箭急馳突更叱咤酒力不支吾數里進一竿燎茅烘濕
衣客有見留者徘徊望神州沈歎英雄寡

既離湖口縣未至落星灣舟中三兩程程見廬山廬
山遮半天五老雲為冠朝看金疊疊暮看紫巉巉瀑布
在山半髣髴認一斑廬山忽不見雲雨滿人間

雪霽下揚子閒望江上山山如白玉日照金孱顏是

時江水淨影落清鏡寒潮催庾信老雲送佛狸還萬古
感心事惆悵垂楊灣

衡山為真宮道士飲我酒共坐有何人山中白衣叟問
叟家何在近住山洞口殷勤起見邀徐步入林藪雲深
險徑黑石亂湍水吼尋源行漸遠茅屋翦如帚老烹茶
味苦野琢琴形醜叟云司馬遷學道此居久屋東大盤
石碁畫今尚有古木庇覆之清泉石根走因悲百年內
汲汲成白首仙人固難值隱者亦可偶追惟恍如夢欲

畫無好手

江湖小集卷五十六

欽定四庫全書

江湖小集卷五十七

宋 陳起 編

周文璞方泉小集

鍾山賦

陟古阜兮逶遲望故鄉兮徘徊日日忽兮欲下抒予心
兮訴哀昔王氣之初發有神人之稱孤逮温雒之弗競
亦中興於南都因融結以作此鎮倚崔嵬而在東指牛
首以立闕背龍盤而作宮後季嗣興規模屹隆張皇帝

圖咨謀國工陰陽既調清寧亦同司馬爰業而引前太
極穹窿而當中華林挂鼓璇宮歌鍾直矗丹楹兮暨暨森
翠氣兮融融殿薄苑記密如魚鱗中納元氣仰規大辰
將欲賓毳裘於九夷負黼宸於萬春攝提紀歷卷舒效
珍回皇風於太初散靈雨於無垠及乎分代易姓滅沒
變遷厚禍隱毒實生其間紫髯昂來黃鬚載奔索蜜口
苦辭鳩涕潛近奮身而倒戈亦反袂而張拳則見天畫
章衣意貌孔武大白連蜷出渡江渚麗色登梯明雲鏡

空愴舊艷新，遄歸闕宮列。事著憤，誇戰負劍閣。像未塵，
街首將變飲血擊賊。舉烽燭夷戎，鼓愔愔，檣車纍纍受
詔下令燒香諷詩妖祥昏淫廢興乖離傳之到今文字
峻峭音節悽悲雖衽席之上巖石之下可聽可詠而不
可思矣有如斯山則偃蹇干霄隱天蔽日雖涉世母利
害蓋與時而出入哀圍楸兮江楓旋灰飛兮雨泣殺稜
纏郭晨闇夜明處子傷內老夫填阬匹鳥羣死淫羊衡
行豈曰作鎮而能忘情凡今齊民肯復記憶但能聯絡

相命趣具酒食上蕭齋而膜拜撫漫碑而口嘖告祝於
蔣侯之廟遐眺於周顛之宅野芳敷滄山嘯啗噢渺歸
興分亡盡樂興哀於戲劇嗟夫系緒悠遠條流煩貿若
錫嘏於泚水兮亦嘗併力以扶揀彼大勲之未集兮自
賢庸之弗究緣義類以敷詞兮庶茲山之可乎

方泉賦

惟山居之嵌吟兮有泉出而方窪彌歲年而沃深兮雖
苦寒而萌芽蓋隨區以賦形兮非浚工之所加吾初以

道為澤兮以溥溥而為家既自抱於潔清又收散乎英
華贊商易而非僭兮働坤輿而非夸摩天蛤非神奇兮
出矩王非矜夸雖使女盜冠而窺兮僕夫汲而盈車故
豈噉以為貪兮亦豈蹈而為邪將竹引以種樹兮放為
池而漚麻順脈絡而襲水土兮則又豈退虎豹而進龍
蛇噫吾命濡滯於此丘兮又何敢怨懟而舛差

燃犀賦

智者鑑物貴於察物後來不察其智幾希智以神為用

神以智為友豈無其無而有其有庖犧女蝸登龜斷蛇
風氣既開淵流七涯故巢居僂於仲舒表柱燼于張華
若太真之事吾嘗以告諸徒矣博物者曰怪怪好奇者
曰輕輕盡性者曰渾渾窮理者曰冥冥如此則溫子將
不得為哲人子持賦於牛渚兩山之間老松古木倚而
和之則庶幾乎敬聽

皋橋

伯鸞出京師慷慨訶五噫豈無濟時心升降與我遲有

來適吳中春梁抹寒饑吳人皋伯通舍之慰窮棲方志
雖或除此橋猶可稽伯鸞號逸民佳傳照綠綈伯通賴
有此庶幾與之齊至今閭門外兩塚陪要離累累各高
大冥冥春草萋昔古賢哲人不計鳳與雞焜燿亦偶爾
埋沒何淒兮出語賀兩公亦以昌吾詩

姜堯章金塗佛塔歌

白石招我入書齋使我速禮金塗塔我疑此塔非世有
白石云是錢王禁中物上作如來捨身相饑鷹餓虎交

相向拈起靈山受記時龍天帝釋應惆悵形模遠自流
沙至鑄出今回更精緻錢王納土歸京師流落多在西
湖寺錢王本是英雄人白蓮花現國主身蛇鄉虎落狗
脚朕何如紅袍玉帶稱功臣天封拆開即退聽兩浙不
聞笳鼓競歸來佛子作護持太師尚父尚書令一枚傳
到白石生生今但有能詩聲同袍秦外銛師兄哦詩禮
塔作佛事同喫地爐山芋羹何曾薰陸綺床供但見相
輪銅綠明哦詩禮塔猶未畢蘆葉低飛山雨濕

初至長干寺

雲杪熒熒一塔燈
覺皇舍利寶煙凝
山門推上三更月
似照前朝禮拜僧

回次秣陵

我行古井邑
北風吹倒人
旗店語簇簇
石路聲鱗鱗
下車得少憩
亭午聽司晨
豈但田杭香
更覺村膠醇
懷哉厭王氣
契濶毋重陳
舊為秣陵尉
今為鍾山神

哦松夏夜

雅頌聲流到楚詞更無人見獨看時池頭五粒初搖動
却替幽人說舊時

鷓鴣

夜聞春雨來濃綠淨於洗有禽自南翥自呼不能已豈
非湘川下或自江左起黃陵見哀妃白下感遊子仍多
憂其兄宛然深樹裏汝兄今何在荆棘日靡靡豈非囚
空山或已投逝水年深桎梏化波冷皮肉死鷓鴣謹勿
庸此係造物理吾若破拚言汝恨入骨髓風吹慈竹林

苔暈上深紫吾亦念故鄉
日夜夢鄰里不如各歸闕
月照西鄙

懷何月湖

星星鬢髮卧林丘詔使東川作郡侯
髯叟望公來海嶠瘦兵迎守去夔州
珍圖想掛茅齋壁巧石應隨竹釘舟
教得巴童歌舞好侍郎千萬却歸休

瀨上懷古

古寺闕岑鬱空梁懸齋魚神坐既歆仄
德容亦饑虛先

生貧有命山僧樂無餘
長安滿市花疋馬吟九衢
寥寥北却山而誰噫
荒墟豈有先生者亦如山
僧歎首風振茗華重露落
芙蓉何當醉尉歸方坐釣水隅

瀨上貞女祠

估客征夫上野橋
錦襦玉珥亦蕭條
人間多少乘除事
到了英雄恨不消

銅雀研

君王有遺令
婢子守空臺
遙望西陵下
漆燈照鴛柝
玉

顏闕釵澤松柏生悲哀佐吟短歌行想像姦雄才清泉
沈金彩古煙凝紫灰零落故瓦在雕鐫若陶坯為人作
書研詞章出詼諧上下千載間流轉何悠哉那知墟中
人天命不復來齊昏亦披倡增三築崔嵬年年漳河頭
野棠如雪開

丘慶餘畫兔

家住棲賢雲泉石恣幽討寫出明視孫眉目增媚好卯
日行跋屐衣褐坐芳草脫身文字禍見幾恨不早仰候

月盈縮修眉幾回掃
迷離望靈藥青松為三倒
山人書姓名欲使好事攷

夜坐讀書

此生無耽嗜獨具愛書癖
旁搜固未暇乍見亦略識
塵土苦見汙更苦官事逼
紙燈自既剪竹牖仍僕織
山邑少文獻有亦何自覓
隨行五升瓶一歲無滴瀝
向來長安市閱之常竟夕
悵然夢裏去莽莽雲雨側
哦此謂寒蠶夜漏三十刻

春雪

崇禧仙館似官居二月寒風峭有餘傲吏吟哦峭空下
野童放散夜堂初熒熒宿火煨村酒煜煜殘燈鏡道書
忽聽打窻聲更急快移銀礫上枯株

鶴廟

櫻桃花覆地古廟自青春帳裡還丹使山中采藥人風
林梟黑虎雲路列班麟欲見神君面連朝禮北神

玉晨口占

風鳴長史昇天栢草護仙翁
瘞劍坐瑞像殿前亡馬跡
養龍池上有鼉鳴

華道士白胭脂

蕭史水銀粉
番女紅藍花
狂奴愛風調
脂澤逐成家
鏡開青峽月
衣近赤城霞
欲下人世間
榭林栖晚鴉

杜鵑花

雲樹重重和淚吟
故宮遺廟有知音
秦吳萬里皆芳草
染到山花恨最深

新柳

長條導幽情淨色穿戶牖酸風醞如醋少待濃似酒
颭颭金絲垂滿眼遮老醜

王道士庵

出家纔二十小築契初心永浸籬根冷苔封井白深猿
啼天慘慘犬吠月陰陰又踞藜牀座焚香鼓內琴

南華陽洞

稽首遊名山駕言入華陽南洞極秘怪松草泉水香曲

几妙隸畫殘碣刊靈章俛首試一闕冷風襲綃裳守菴
敬愛客暖我紫朮陽遺我鵝眼錢云是洞所藏往有尋
幽徒入見黃金牆侈心或已起幾受竒鬼戕身儻獲會
遇敢恨飛蓬霜更丐一片玉小築安閑房朝披神芝圖
暮試饑飯方

金牛洞

凌競下危梯俯偃入深穴回身避雲霧偃面眎日月葯
苗護谿訝竹節截薜業安知幽蹊下有此大竒絕金牛

鏿光景仙牒尚可閱
崗頭春已半
枸杞如點血
便恐顛風興
橫吹石崖裂

山行行歌十首

受錄壇前雲更長
春風漠漠杏花香
峰回路轉無人處
恰見天書字數行

竦染雕珉萬萬層
雲頭晃晃現觚稜
野人自愛幽深景
只是尋常不見僧

道院中間沐髮容
施來元自贊皇公
君能百拜香煙下

不怕舟瓊路不通

蟲蛙黃連徹夜焚秦謠楚誦少人聞遊前欲問新宮信
鶴帶靈芝入暮雲

帶淺人家隱樹深嫩晴天色弄雲陰好風娟娟穿林去
吹散松黃似鬱金

遨遊自是不思歸花氣蒸衣氣力微拋棄文書亡俗累
嶺猿吟後閉山扉

天風穩送步虛聲雜和漫山檜栢鳴遠望山腰多白石

細看知是野人行

中峰道士藥珠丹曾與神仙玉煉顏見說醉來燒隱訣
藥爐蕭瑟卧雲山

紫陽道院古丹青恨渠猶畫化胡經晚香滅没人歸後
自有天風撼玉鈴

砌穴蕭森隔土橋項梁城郭最蕭條羽衣歌此招魂魄
直送旛旗上九霄

壬戌春日

自從憂患長精神兀坐齋房過了春
鑿落盡乾官燭暗
擣蒲齒冷旅囊貧皇天老眼非塵世
白日閑愁自替身
一段風光好如畫未須全與路行人

王荆公墓

一大荒墳上悠悠落日斜子孫來祭後
守墓掃杏花
野老從余話文公在半山蹇驢追不及
落日寺深闕
年少坐談玄鍾山直北邊春風吹夢過
汨浥舊貂蟬
守法曾丞相能文陸左丞風流如未泯
應作寺中僧

出白下

南朝禁禦夕陽明猶與遊人作隊行
煙滿天淵池上路
菜花黃盡綠陰成

遊西霞四首

破曉逗苦霧客鼻何酸辛
山中氣候異初日如燭銀
田間石獸多知是肉角麟
古苔半皴腹化作蒼龜鱗
兩柱既岌紫衆碑亦嶙峋
幽涂得竒觀未敢辭埃塵
連年抱離憂百嗟亡一呻
花委鬢毛晚草奪袍色
春愁中書櫝

失夢裡歌鍾
隙窮愁著文字
屢被同行嗔
同行不相知

而況悠悠人

道中石麟
碑柱甚夥

吾與空門友
相扶歷芳甸
天機久深妙
梵本亦貫穿
徐馳得幽欣
濟勝愜孤願
宿芽發輕苞
寒卉抱短艷
鹿走風生林
僧歸雲入殿
寺從齊梁來
諸彥題品遍
安知千歲後
未欲陵谷變

優尼製銅覺
欲住女主齡
主稱金輪王
錄在華嚴經
而捨覺富貴
愛慕塗椒馨
月黯回心院
妖魂啼窈冥
僧人

弗知此獨受一峰青分減儻及我終歲棲林垆

府帖昨夕下許奉半月急遂作茲山遊愴怳憂思失古
跡隨榛莽久久失修葺南唐石塔好巍然對人立高碣
纏蛟龍竒畫耐風日明且丹陽路萬感當畢集說似石
婆翁皆須為余泣

再如金陵

再踏江東路詞窮不復論江泥沾苦淚津鼓聚歸魂庾
信因愁老陶潛為酒存孤跡雖落魄不敢望明恩

道中望茅山有感

危亭對名岳，畢景扶鈎欄。白鷺伺察過，低昂若分灣。去
歲負笈遊，最佳元符間。櫟林帶修竹，清派流珊珊。離留
叫晝靜，洞天生春寒。偉哉老宗師，作屋雲雨端。竟為殺
虫蟻不活，叔龍鸞遺體。但解蛻故宮，亦燒殘。今剏已半
舊，萬柱扶玄壇。遂以兩不借，一筇履巔岼。入宅問玉斧，
採芝投金環。墨沼篆結字，丹臺氣成盤。將謂便隱遁，遽
爾雁門關。夷甫塵尾墮，荀令香爐閑。再拜望竒秀，恍然

神觀還如見大仙伯被髮綠映山兩君控鵠從俱著漢
小冠俗累當復馳煮藥鼎欲翻

病起寫懷

夕陽蔽天涯望望不見家牛斗象緯微吐吐空咨嗟此
時將細碎說與枝上花

送友人入浙

行至王冀公墓上

小縣登樓上依稀是去年更聞吹短笛飲散覓歸鞦丹
葉標寒渡黃花冪野田重來弔古地為拊石羊肩

輓轡體

野人無事時常誦極玄時寫遍千山寺吟行九曲溪誰
為補天手同是決雲兒欲去無人問今宵醉似泥

金陵懷古六首

孫伯陵頭水最悲蔣侯廟下月來遲夜深行客心驚恐
猿掛晉朝楓樹枝

司馬家兒持酒杯天星亦下澆崔嵬當時若便效牛馬
定有孟津師旅來

愁看幕府夕陽邊
更難籠在目前
跋扈飛揚只如此
登臨那得不酸然

杳杳舊蹤尋不得
茫茫遺恨有誰窮
長安敗績誰憐汝
霸上收聲未到公

琵琶未盡使人嗟
淚洒華林御苑花
今日聞韶無處所
鴈煙蛩雨屬他家

江水無情碧草春
北朝留住老詞臣
子規啼向青楓樹
為爾離鄉去國人

江南曲四首

露下五原秋雨打三楊愁齊梁才子多埋在青山頭
郎與新歡濃儂與舊歡熟懊惱對行人當為歌艷曲
孤館聞啼鶯日暮脂粉薄芳醪似泥賤那得不行樂
雨認巫山氣江通淫預情相逢未多時秋花開古城

吳中秋日

郊原落葉已離離尚有孤花闌短籬小醉不成憐病後
苦吟未了說愁時鬪雞走狗爰絲喜臨水登山宋玉悲

豆角已收無別事待同野老赴襟期

野薔薇

娟娟籬頭花白白間綠葉明光裁
販袴不掩遊子屨餘春背人去乞與弄芳蝶感我萬古心
離離不相接我行田野間落魄何所挾猶能自撐柱使氣學漢俠
悠然芳草畔見此放逐妾羅帷未生夢粉面反成怯幽香薰倒人
山麝火初爇長亭或相思如見玉蹀躞

狼山

吾母禱於山生我偃蹇身周八始入寺所天俱不辰歸
人復何願所願清戰塵勿復論銜鈎去作瑞世珍

烏夜啼

何人彈阮咸故故輕手摘彈作烏夜啼此意我所惻南
朝有帝子作牧號侯伯著身疑嫌間生意日偏仄愛妾
聞啼聲改鎮鎖竹冊或云長安吏性命在頃刻小婦聞
啼聲赦令數大澤身雖不肖甚幼小著蒼幘再轉作縣
佐欲塞父祖責濡墨決疑訟行朱慰冤魄羣凶見之怒

極意便剗磔首沮隸陽槁公議亦已格痛掠及庫胥指
作盜錢賊胥既僮椎鑿手隨面愈黑書款自誣伏身竟
遭刻畫酷毒一如斯誰謂彼無策謗書入外臺遂坐使
者刻牽連入冶城五載窮慘礫礮詞叫穹昊哀慟人叵
測若無磊落者誰肯為昭白翻思受禍時何但鍛羽翮
愁冤傳里巷泣涕到臧獲嫠母偕妻孥惘惘望秋色豈
料今日下置酒設豚拍聽此哀絲鳴但呼說不得月明
客已去庭宇鳴啞啞世人見慈烏唾笑滿阡陌誰知事

乘除禍去反為福蒼蒼上林枝當去作謝客

贈趙子野歌

與君雖為外兄弟語話尋常見肝肺自從不見半年餘
每望吳雲輒流涕蘋溪松江同一波半年不見當奈何
長安市上相就處弟能起舞兄能歌兄今賜弟南薰殿
滿載宮花上林宴弟歸便著隨遊冠他時山中儻相見
吳王臺畔楊柳黃吳姬對坐調絲簧阿兄自對吳雲坐
呼弟不來應斷腸書來不應寄他物只要秋林一雙笛當

使蠻奴月下吹此時此夜須相憶

古琴歌

山人袖攜古琴來形模拙醜腹破穿上兩金字亦殘漫
自云得自十年前十年前宿野店間野店岑寂無炊煙
只將百錢乞翁媪回買濕薪煨澗泉老翁持此一木段
刀痕鑿痕斧痕蒲秀才望見三嘆羨學琴以後何曾見
此是成都雷氏為揩摩雷字分明現持歸修治調曲成
曲成他人不肯問初彈羨里可釋憾再鼓廣陵如雪冤

將歸古操次第傳龍入我舟何可憐

憶昔

憶昔在童初身輕俗累無雲霞明道服日月綴仙都屑
玉三危露泥金一丈符遨遊即閭闔佩帶或昆吾學語
闕真誥談玄校易圖竹間時轉拊松下亦擗蒲謫隨歸
嵩壑庸凡近僕奴極知方匿景何敢遽搏扶請命書盈
紙祈真淚迸珠但能覘帝座不恨守天厨譴臣知難追
心安敢自誣相隨有芒屨還欲化雙鳧

弔堯章

相逢蕭寺已纍然自詠離騷講太玄
極目舊遊猶白石傷心孤塚只蒼煙
兒從外舍收殘藁客向空山泣斷絃
帝所修文與張樂魂兮應是到鈞天

遣興

望見山櫻媚短岑翻然便悔出家林
壞車殺馬空嗟晚
闕 焚荷直到今荀蕨久為歸去計
雲烟無復肯來心
平生最愛花濃淡看了斜陽看暝陰

夜歸

還山迫暮夜枕石唵下眠夢作童子日采花弄寒泉回
身在人世欲去塵網纏永謝歡樂情把袂入紫烟

送道友歸

浮雲起足下是子欲歸家藏室收雲靈丹房掃箭砂時
聞搗藥鳥啼向款冬花莫使山童去驚飛逐亂鷗

黃洞龍

一從負圖與負舟天公閱之居靈湫重瞳胼手久不作

蒼苔古木兩漠漠朝來石磴鱗鱗濕如覺蜿蜒為人出
甘霖黓焦卷多相俟吳雲未莫相失

歸憩仁王寺

重到招提未覺遲鉢單初副袷衣時僧房齋院門門閉
梅子枇杷樹樹垂蟻蔭經幡求託化龍纏佛座學慈悲
長年無事閑來此坐對空山諷小詩

下竺

靜看唐人刻相連坐石陰鳥啼留客意果熟住山心野

水流詩葉天香襲道林雲根有桂子應待月中尋

七言

雲竺前頭卽御園小風斜雨入梅天放歌偃蹇如圓澤
古貌昂藏若稚川尋得數行天寶字破他一夜草堂眠
此生更要窮經論惆悵高人舊石筵

過葛天民新居

為憶空山雨因嗟短鬢霜幅巾終日仄侍女古時妝烏
白殘林外丹砂舊井旁不留彈月畫只踞淨名床湖鏡

秋容淡雲莊曉露香汲泉須透脈種果便成行使鶴過
村店攜孥上野航極知秦外叟全似賀知章對佛稱居
士翻經悟法王自將詩檢校猶與竹商量嗟我渾無賴
非公不作狂莫移松下石老子要乘涼

十月過鳳山舟回入項王祠用前韻

隊葉濃如染孤花淨似霜溪山如有待朱粉炫施妝勝
景如天上雄鳴自帝旁工陳白玉瑄人坐紫金床古兕
稱春酒靈虬換夕香風箏猶有韻星弁忽分行念此鋤

榛壘頻來渡葦航，欲揮終極淚。只苦廢吟章，慷慨辭歡
伯英雄。憶憤王逝，嗟弗及撞斗，恨難量。起舞何勞短
行歌，未要狂。斷雲將落日，千古助哀涼。

送人返蜀

都市今重到，文園更倦遊。依依返窮峽，得得上歸舟。往
事深能憶，沈疴久合瘳。行經古祠廟，應酌舊山丘。梁甫
遺馨在，降牋殺氣浮。白衣猶肯出，黃裏不包羞。一聽巴
人曲，多貽漢甕花。蒙蒙塵漠漠，苑抱水悠悠。蠢爾狂童

輩俱為滅族因坤維元自正棧閣未應修管樂誰能並
卿雲亦可儔時者著禱杙聊以畔牢愁肆斫重開險銷
沉萬壘秋堂留石室畫歌尚竹枝謳寒蛩催遁客啼鶻
識故侯屈沱嘗角黍岷嶺看牽牛從此多談讌逢誰共
勸酬近前持硯削成列抱筇篻近歲安樞相宣威在益
州君歸如訪謁朝論必咨諏列聖方垂統羣公亦好修
焚燒已郿塢誅殛到謹兜虎豹參差束魑魅次第投衣
冠通海嶠干羽格蠻陬江寇何勞服淮田亦粗收旌旃

仍使傳炮烙任兜鍪玄象摧天狗昌陵控玉虬嗟嗟几
上肉斷斷幄中籌貢錦浴王會緘辭告帝謀聲名與勲
烈應逐漢江流

戊辰感事二首

久要和平福須寬次第刑諸公善調畫熙祚必清寧夾
道焚香拜今知病酒醒謾勞雙鬢白何止故山青妖緯
朝沉彩非煙夜透扃願同臧獲列齊壽八千齡

幕府才方盛軍師意最高何年燕巢木幾處馬騰槽馳

騁心方壯指麾身更勞周詩歌勞徠費哲言說逋逃行闕
占風角穹廬拜羽旄飛騰真有種淡泊正相遭

山居書事

茶蘼架倒無人架全似老夫狂醉時昨夜一場溪雨橫
又漂苔蘚到花枝



江湖小集卷五十七

欽定四庫全書

集部

江湖小集卷五十八

詳校官中書臣張姚成

助教臣常循覆勘

覆校官主事臣龔敬身

校對官助教臣胡子襄

謄錄貢生臣孔繼峯

欽定四庫全書

江湖小集卷五十八

宋 陳起 編

周文璞方泉小集

投金瀨賦

世之所謂英雄豪傑之倫常多罹於困厄方伍胥之遭
憂兮寄微命於一食就嬋娟以就哀兮乃鞠躬而進筮
何衆人之未然兮遽見竒於女子女既餉胥又自咎兮
沉厥軀而弗顧胥東行而入吳兮承君命而伐楚考鐘

鼓以假道兮復過歷乎故處不見禱結正襟擊絮兮
莎葦披靡乎極浦山空水溟無他人兮老嫗嗥呼乎
后土諮諸人既弗又兮質諸鬼兮無所捐美鎡於瀨
中兮固取信於來者凜魂氣其安之兮為慈母而下
取庶幾用此以全其老兮又足慰乎地下惟戰國之
既衰兮士方賤乎犬彘弄人命以為寵榮兮雖妻子
猶弗忌悵聖賢之不逢兮流遺恨於後世偉淑靈之
好脩兮視死生於一試故皇極之未建兮曰蹈道而

則未閭閻筭珥而至此兮誠賢者之所謂吳既霸而
胥稱忠兮伊若人之所遺後千載之悠悠兮有遺廟
於故壘井邑改而經畫兮桑柘鬱其蕤蕤屏蘭蒨其
弗歆兮矧昏淫於諂祭欽高風而可企而將墜兮又
秉節而不翹重曰投金于淵明胥志兮女曰未然儻
鑒此兮

石麟賦

吁嗟麟兮爾所守者陳帝之墓風淪淪兮鳴松草霏霏

分泣露在昔鳧鐘振金龍輜載素域戶肇開靈旂徑御
侍女薦玉而長號侍臣抱弓而回顧淒聲竟天怨毒凝
霧旦而視之惟爾麟兮高而不屈曲而弗踞哀而不傷
怨而不怒叶象製於圖籙謹工程於尺度千歲而往若
朝與暮陵栢禿而翁仲逃野棠發而狐兔度偉趾角之
巋然獨巍巍其如故惟紫微之舒光絕巨筆於尼父父
為爾而涕泣蓋自悼其弗遇予有感於斯文乃斐然而
稱賦亂曰噫人之生具五常其聰明者居而王頃刻之

隔或聖狂島處索虜方混茫天張義旗自晉陽蠻貊冠
帶我衣裳昭哉上帝聞此祥千秋萬歲立道旁吁嗟麟
兮庸何傷

黃連香賦

余披五嶽之圖禮三茅之神莎服笄冠步行澗濱有老
人者手持竒薰颺於崑谷乃賦以文句曲之天華陽之
山黑武蒼蝮各持籬藩爰有藥樹流膏滿身味苦氣厚
獻于丘園有道所享不肖所儼世上齊民業流灣濼罔

知紀極孰能遮欄爾惟昧昏能反其元當焚當燔上聞
九關爾惟飛翺爾魂狙猿速往逐臭母啓我垣網緼輪
困化為明煙素皇泰尊實鑒我言欲盡其微祗以贅煩
余方肅而聽俛而拾仰而不見已入石壁

遊洞霄

天柱青峩峩石筍危不墮晃晃銀雲收誰子開玉鑰崩
騰放閤水煜爚入洞火神境偕靈休乃欲搜碎瑣媿被
朽濁顏一得在無我致彼老鑄凝披褐迎路左願留護

銀鐙被葉盤礴羸玉笈付九虎遊宴升業礮為言子連
去勤苦悔坎軻反樸招太和當兔運劫禍慟哭出青松
殘齡其或可

題喻玉泉家亦可樂亭

先生亭非伯夷築亭柱亦用秋山竹但令家有滿架書
何慮妻兒少饘粥朝來相對亭上賓洙泗尺度羲皇人
先生已死名不泯常與此亭作標準後來鄰觸闕伯怒
僕夫預起池魚慮拆亭拆亭先拆柱有孫抱柱出煙去

三十年餘復改觀有孫如此不待贊似魯靈光偶不全
令人見此空三嘆

病後

風燈露水兩茫然莫為歡華少壯年無病更須求藥物
愛閑猶要覓緡錢此生身世柳榆裏末路光陰泣涕前
快出囊中食玉法白雲深處日高眠

上冢

蒸魚燂肉當好羞北面百拜如有求願身長健兒孫好

歲歲此日燒松楸紙錢灰盡淚不盡孤也雖在猶拘幽
泫泫金盞山下水相送直過撓灣頭

送人歸苕溪

憤王祠廟桃花下愁若看春又隔年今夜白蘋風更惡
去時須傍采菱船

歐陽琴歌

嗚呼箇是文忠琴嗚呼此琴今尚在堂中圖書散失盡
留得七絃傳子孫六言自書書在腹古錦梅花留不得

嗣孫賢者能忍貧不向豪家博珠玉初鼓如撼昭陵松
鞏原流水青溶溶三宗龍衮在帝左曾把鈞天賜與公
再鼓似播清潁水只將漱流肯洗耳曾蘇兩生招不來
自寫新聲付兒子堯囚山舜放野自茲以下不平苦與
君所得歸女謗此日一洗清萬古小孺昔誦五季傳頗
訝春秋體微變今來再聽七絃琴南薰遺製喜復見浮
雲流盡白日逃何用廣陵與離騷譜成只度歐家曲秋
聲賦共廬山高

琴有公題

歸姑蘇

舊巢已是別人門
竹自蕭疎柳自髡
河北謗來須混俗
江東讞就欲招魂
故王未納耶溪女
越相先尋澤國村
懷古感今吟不盡
一雙清淚落醜樽

晨起

閉門不與俗人交
玄晏春秋日日抄
清曉偶然隨鶴出
野風吹折白櫻桃

澗上小飲

方坐愛蠲潔俯窺為回紫汲汲雨露澤悠悠江海情引
之灌蔬圃亦足發光晶陶然未須去於焉潛我名

送道人歸華陽

山中無酒禁戶戶有松醪旋汲泉炊飯多挑筍助庖天
燈將出現野月未能高憶我初遊日先將石洞敲

寄茅山道友三絕

伏事茅山過一生癡心不望羽車迎舊時手種黃龍子
今解升雲入太清

九錫碑亭日欲曛有人趺坐對爐薰
憑誰傳語桓司馬
句曲山中只白雲

葉珠宮女傍瑤屏自把韋編問姓名
回到人間無一事
紫陽花下白雞鳴

秋日孤山道院

孤山有何好修竹有樓居人在秋雲
杪香凝午醮餘芳
林多落果靈沼少驚魚歸棹聞歌詠
猶如學步虛

寄韓礪泉

窮冬孤陋只書癡肯為凶荒強忍飢師友淵源似公者
輿臺貧賤亦安之人來山縣猶須債雨映茅簷但要詩
欲詣樓居無逸步要從老手化神奇

訪梅二首

起看重霧白漫漫畧見春風在樹間傍水出籬猶未快
淡煙微雨又青山

幽花隨在石根傍幾欲移將近草堂草草一尊聊爾爾
跨驢歸去月荒涼

呈韋睡翁

家本汶陽縣累世事耕蠶室廬既焚蕩飄零住江潭幼
及識故老頗聞鄉里談最盛陽和時梨杏香酣酣岱宗
富枯栢孔林存攬檀鄉閭鼎其中寶號玉檐檐去年拜
睡翁知是山堂孫淵流京洛舊尺度歐梅間昨夢返故
里有翁作司南俚句馳寄之何以鐫冥頑

石林

蒼蒼一林石零散少存者分攜多子孫不勝落田野虛

堂有天就乃在絕壁下存者寧非真散者亦已假相君
久藏山遠客初繫馬幽玩理莓苔孤吟坐梧櫓方咏茲
游清未敢泥風雅

絕句四首

巾車初扣槿花籬物物來前總要詩一句坐來模寫了
兩鳩飛下老梅枝

紗籠解散坐門畿生怕逢人索接籬朝雨洒來山更淨
春鋤恰好到方池

解呼威羽歸丹穴可致葡萄獻漢宮
四面八方籠不住
許來分坐此山中

隔林八十龐眉叟理竹疏泉過
一生見說石林身健日
把書只在石中行

客中

客中時序又恁恁孤坐初春
小雨中弄水攀松去年事
令人憶殺洞霄宮

山樂官

山樂官爾誰魂逃河入海俱奔奔伶倫梨園何可論山
樂官予欲爾兮無言如有言為余歌雲門

烏媒

一自弋者篡冥飛亦云多庖犧網未收同類如予何已
喋伐斧篇去去依女蘿

和澗泉賦山楹

共惟古至人用意事物表一丘謾摧殘八極自圍繞不
勞日月運坐見歲時了魯夢久不作楚賦邠遽曉既煩

匠氏來誰謂此山小雲衣方紛敷雪幹復夭矯沐浴抱
歸藏樂甚憂悄悄

重經洞霄

曩既負幽討今敢萌遐心扶桑下陽馭砮磬浮空林瓊
臺渺迭蕩蘂珮棲高深屢見仙驥舞遙聆元女吟如逐
觀開闢那復憂崎嶇抱關職貴重啟閉非所任靈飈掣
虬戶同此琅琅音願併翠綃水寫之朱絲琴

大滌洞

嵌空纔入泉，滴瀝隔凡倒。懸若錐立，道士云是閻邱公。
入向華陽便門出。

岸憤

岸憤坐亭臯，休嗟命不遭。通幽文似呪，招隱句如騷。
日下桃花熱，風低鶴背高。真遊窮不盡，只是酌芳醪。

翠蛟亭

禹驅龍蛇不驅蛟，依然踰此山之坳。有時淵亭忽奔放，
如負山走如玉跑。昔時莘渭正如此，咨爾來者無空朝。

寄題館娃即靈崑寺

突兀僧監是館娃，
櫺廊猶自隱晴霞。
清明但長離宮草，
精魄應棲野寺花。
白苧黃蕉迷鶴市，
紫蘭綠葢屬漁家。
思量種蠡成何事，
空使君王式怒蛙。

小寒食

從來寒食多風雨，
不料窮鄉亦管絃。
壯歲心情悲昨夢，
異鄉時序感流年。
偶隨遊子來溪上，
因與棠梨立路邊。
從此堪悲轉憔悴，
隨群同上釣魚船。

五月五日至京口

回回望秦淮出語重煩喋凱風初酸辛靈雨更淒切疇
昔之所經望見心已折粵從世態換轉見凡此別緡錢
換仍艱旅飯雜砂屑坊市半頽毀物貨僅羅列鳴鳳斯
不聞遺沴猶慘烈凌晨轉時序涂路已入浙景清雖快
人忍作昌歎節身本無瑕疵反被讒口謀低翔就師友
庶幾免磨滅清曠雖未能玄暢差可悅如其守微言予
將俟來哲

贈蘇召叟

句容縣古寺壁有道元筆見見纓絡軀渺渺煙霧質一
堵最光怪朱泥久堙鬱泥去墨亦盡慘淡意都失恨不
還其人加巾急鞭扶毀棄加弗敬請論如漢律羅漢院
塔影顛倒難致詰稗書誌海翻此理殊未必今君所歸
路正向此中出況有弔古才仰天痛呼屈勿稱荒唐言
析理資按述其餘傳播詠淋漓滿箱帙棲霞者悲壯茅
洞者清逸珍題倘相命當第為甲乙

半山寺

野芳汀芷互幽妍
相國風流亦未傳
袞冕塵埃半山寺
自相撐住過年年

跋鍾山賦二首

丁年寫了鍾山賦
舉向禪宮入定僧
僧却為余言未好
扶行同謁晉諸陵

往在秦朝問六朝
江樓祇有女吹簫
昭陽太極無行路
歲歲鵝黃上柳條

過鳳山有感二首

當年準擬作家林，溪墅棲居意已深。
隱者自應尋別業，鳳兮何肯負初心。
參差一段囊中玉，激烈三更月下吟。
若不速來相就飲，定應從此失知音。

秋蕪闕是草堂基，惟有南鄰盡得知。
辛苦置家將守冢，告求廣地要穿池。
淨蓮已付鄉僧掘，慈竹從教墓客移。
雖向龍灣作者舊，此生寧沒暫來時。

絕句二首

臯伯通家鎖夕暉八年寒食數歸期江鄉橘柚花如雪
不許離人戴一枝

入春便與僧為友紫萼黃英見坐禪昨日鄰翁催入社
謝他只是說無錢

辛未九月晦日

遺體即母身哀哀勿重陳一貽泉壤憂兩見霜露晨繁
霜與重露塗抹隨荆榛身即未殞滅強與松柏春遂於
搖落中見此天地仁玄鳥已辭社蓐收方降辛拭淚聲

秋旻何由酬艱辛

閑居日有幽事賦作

竹暗僧窺戶
莎寒鶴上廳
壁懸陳處士
屏照少微星
累甃為蔬圃
埋盆學蓼汀
自知癡得計
常用醉為醒
野客兼稱僕
幽禽代作伶
浴見翻落磔
鬪雀墮空庭
筭數推三甲
防身召一丁
紫頭松葉響
牆角柚花馨
梵度堆書笈
醪罌隱粟餅
茅茨隱烟雨
雞犬也忘形

苦錐歌寄澗泉

我園秋果枝纍纍縹青紺黃使相持役夫牧人記註之
尤所佳尚惟苦錐苦錐兩株結蒙密追惟丈人語天出遂
欲供之作護實他往返舍百無一乃被猿狙打都畢摧
藏睢盱以自扶季冬初旬日協吉寒風急霰俱栗烈自
慙曩者信已失初歌獻馬效詼譎

臘月八夜雨

愁雲欲雪未成雪忽聞寒雨夜淋浪但知歲月隨寂寞
不悟乾坤發艷陽天黑鬼車聲更大夜闌客枕夢初長

明朝起視籬砌下草芽浥浥又回黃

送礪泉

一自接道誼形容生輝光束情謝流宕捧詠增慚惶矯
足時切窺雲海何顏唐長安賣藥市董董十載強復綴
守藏吏得近中書堂心計常自珍孰云失其良稽首謝
衆去酌酒相扶將融風促絲蔭代對日夜忙石澗流自
湧玉山禾欲長安得便奮飛相從決高翔

送薛子書

龍泉餞語餘便使借船居津吏方抽木官人但載書潮
通白砥石身近碧京魚一卷詩文就臯禽亦自如

晚菊

亭亭砌下黃金花霜後顏色如矜誇
玄英摧挫百卉盡獨自照耀山人家
湘纍晨餐不論數千歲高丘恐無女
君不見天寶杜陵翁晚節嘗為少年侮

誦哀江南賦

高橋沙水澗臺城蔓草纏下有煩冤人誦此危苦篇我

生楚臣後身在江楓前但見去魂遠不見歸魂還惟昔
愛好詞細碎窮註箋中間多佚事他書亦不傳極欲補
闕漏今方長弃捐重効嘈嘈聲庶幾與周旋

簡正字仲南

白髮梁鴻隨暮猿不辭引領望兄門久無清夢相追逐
今喜遺經為討論數葉赤楓鳴客路一畦黃薤憶家園
著書不就身何用每見飛塵恨滿軒

重遊栖霞

林鹿已盡虎不見邇來流民所蹂踐殘僧自言昔遭變
藏埋經像猶可言流泉鳴悲雨推殿滿崑慈相沙汰難
白盛綴粘或壞面慧命弗絕如斷綫況我憂患經歷遍
見此悲酸尚兢戰千聲萬聲走出門門外秋花泣餘泣

出溪

二月天景佳波清見魚蝦望中何所好溪女摘蘋花淺
淺猶可涉素手花似雪隔卷聞謳聲風來正相接

過舊居遇隣家子述懷

憶昔垂髫時最感隣媪嫂剪羅作髮髻添璣綴紋襟今
回遇孫枝面墨體枯槁念彼舊宅凶災釁失依保此生
未還役況復念家道冷節返鄉閭江路見芳草奪時罹
荒饑連歲愁浩浩流離在山縣只有泉水好野櫻聚紫
玫街弄晴日杲半為烏雀盜半被奴婢討伯弔必盡護
盤釘如拱寶坐薦一瓊春便足舒遠抱

正字南仲祭詩

昭陽作噩冬愁雲凝上蒼我隨谿谷底鹵莽聞公喪哲

人困中壽頗謂告者狂繼執邸吏符躑躅抽肝腸又聞
斂魂魄玉色貌愈強環泣甚危苦精神都不揚一朝委
廔地千歲還天常裁冠謝成均射策何巍昂連踐中秘
書檢校四庫藏象緯識校尉篇編嘉議郎麟遊夜閣黑
鳳去旻霄黃惟初典郡學吐血謗可傷積疊高於山黨
讞空銷亡故老解噓枯新人工絕吭灼灼藻火衣可使
綻作裳竟罷奉面對射策裨君王愧負臨軒恩穹林摧
棟梁往者流傳誣聖賢失隄防頰裂在眼前悽愴遙相

望二紀獲敬事實亞衿珮行嘗竊季弟稱朽穢敢自將
束教濡雨露采擷參差香雖罹顛沛憂夢寐敢自忘翻
思說待對按述何微茫嗟此盛壯時傾耳殊恣忙但覺
異清濁安知為死生髮櫛逮細碎羅列置篋箱前年日
重九西歸舊臺城蒙索新句詠攣縮紙半張卷頭七字
吟持以獻我兄稱許極銖兩逢人便增評出示鞏雒跋
文字逾西京鼎器寫饕餮肉翅兩目長欵曲彌日留振
刷家苑翔池水正清潔碩果亂縱橫斯時惜晚暮元袂

歌秋陽徐步引升榭如訴後別殞命之迈里廬憑籍蜚
晚英讀書與析理旦旦拘限程爾搜嵩礪微乙亥事頗
詳謹勿攀巷記眎此小傳成亦勿痛揀擇因筆為文章
倚權望江浦披榛穿翳荒培擊祛鬼野鄉志始竄更警
策入心腹陡謂千金輕誰子料承應纔問一籥羸勅具
厨節饌鬆拌糕菊芳終席岌飛動漏下樓鼓鏜劃見睽
孤占覲覲拖晶瑩姬孔情可惻一身行自當日斜亡集
舍蠖跪亡妖祥國典嗇左丘地下收回商師門錫休誅

慟哭發幽榮，滕抱條悵。薛謨方施行，茂洪既暮綴。彷彿日月光，門戶變化久。咫尺未可量，貧疾累祭緩。偶然值清明，雨寒送魂來。素筵見親情，熟食侑介推。覆柝嗥后皇，諒此心靡他。庶幾下歆饗。

弔友人朱子大

鷓居越上其屋為勢家所有

與君昔並丹陽船，形容惆愴俱可憐。自說宅圃及百年，藏三小山出雲烟。土伯小廟自題扁，持照清池分醜妍。吁嗟先君方下世，姪子賣半相炒煎。出尋方伯待救護。

與我密者纔萬錢是身灾疾恐凋謝語未脫口吁皇天
那知君今亦逝川洪崖白石夢杳然竟從他姓改受廛
嗚呼朱君無歸歸來但見空屋椽入抱山骨於黃泉

挽正字南仲四首

千古應無恨諸公竟不能要令參溟滓端合罷飛騰白
草觴麟野蒼山下馬陵有兒持手澤淚落照書燈

卷舌空沉彩芸香亦蠹賢幾時噫鳳沼一旦感龍泉遠
播雕題外高垂若木邊煎膠嗟不及遺碣暝臺懸

珠壁方輝耀菁華未寂寥極知身作祟何用食為妖
象收儒廟簫笳咽市橋傷心紗帽冷三徑雨蕭蕭
一自初聞報哀號向草堂相隨只兒子遠和有山獐土
沃幽宮掩灰凝奠酒香孤身揮泣盡松柏便萎黃

行歌四首

雪壓門外土骨堆一番兩番春始回歸來但見鄰舍換
老樹紅花如死灰商量千古有何事經營八紘非汝才
乘除幻變既如此何不快手鸚鵡枯

天讒天讒光照戶反舌轉枝啼更怒九霄誅蕩帝座高
老我此身無告訴舍傍種園翁作鄰一方泉兮在中庭
齊民書在泉有銘誓將團結為林垆

春霏霏兮秋靡靡嘆息賞音人已死堪嗟玉雪綴空條
可奈芳蕤逐流水融怡艷冶恨欲銷世間風雨何寂寥
有誰肯為吹簫往和蟋蟀諧鷓鴣

先秦古書世已稀國風雅頌聲又微彼美人兮在天路
馬蜚局兮將安歸古人所懷已汨汨今人所懷又勿勿

我亦東西南北人相逢且盡杯中物

遣興

山中雨更愁不是弃吾州懷母未能去無鄰誰肯留
茶人窮似虱藥戶狹於舟一礮多深碧嘲吟尚自由

孤山桃花二首

天上仙人休擲火塵中道士莫燒香可憐絳雪渾無賴
一簇千枝對草堂

莫向蓬蒿恨不遭夢魂曾釣海山鼇當時不合輕仙事

惆悵靈風滿碧桃

送人之武夷二首

精舍人歸入內臺遺基處處有芳埃
小儒更合修壺史
刊落乾魚入水苔

終向名山度此生
此生吟骨要猿擎
洞宮終與人間別
六六峯高削紫瓊

秋晦有懷正字南仲

懷君幾日忘
況復值秋陰
天亦容清調
人難識素心
他

鄉誰饋肉永夜只聽琴高詠龍泉碣相從發至音

贈孤山道士二首

九霄象簡手中擎豈是閑人愛列卿洞裏石田春漠漠
有田多與種黃精

清秋古洞無猿嘯自覺尋行幽意微處士橋邊增悵望
幾回沽酒對斜暉

送人之桐栢

半溪松黃堆碧波狂夫如此欲如何洞天春晚歸不得

司馬悔橋芳草多

送髯高謁方巖

客舍窘積雨出門今始晴
藥苗隨野飯燕子看山行
大道白日晚開汀綠芷生
方巖相見了為謝草堂兄

江湖小集卷五十八